

光緒重修安徽通志

重修安徽通志卷二百三十二

人物志

武功

鳳陽府

吳蔣欽字公奕九江壽春人從孫策東渡拜別部司馬平定三郡又從定豫章遷西部都尉擊擒賊呂合秦狼從征合肥魏將張遼襲權於津北力戰有功歷津右護軍典領辭訟權嘗入其堂內母疏帳縹被妻妾布裙權歎其在貴守約初欽屯宣城蕪湖令徐盛收欽屯吏表斬之權不許由是自嫌恐欽害己而欽每稱其善盛既服德論者美焉卒子壹封宣城侯領兵拒蜀有功還赴南郡與魏戰臨陣卒

三國志本傳

周泰字幼平九江下蔡人孫策入會稽署別部司馬策討六縣

山賊弟權住宣城山賊數千卒至權始上馬而鋒刃已交斫中馬斃眾莫能自定惟秦奮激投身衛權賊既解散身被十二創良久乃蘇是日無秦權幾危策深德之補春穀長從討黃祖有功荊州平定將兵屯岑曹操出濡須秦復赴擊遂留督之拜平虜將軍後權欲圖蜀拜秦漢中太守奮威將軍封陵陽侯黃武中卒子邵以騎都尉領兵戰曹仁有功又從攻破曹休進位裨

將三國志本傳

丁奉字承淵廬江安豐人少驍勇從甘甯陸遜等征伐戰鬪常冠軍稍遷偏將軍孫亮卽位爲冠軍將軍封都亭侯魏遣諸葛誕胡遵攻東興諸葛恪拒之奉曰今行遲若敵據便地難與爭鋒乃帥麾下三千人揚帆徑進遂據徐塘天寒雪敵不爲備奉使兵解鎧著胄持短兵斫之大破敵前屯會諸軍俱至魏軍遂

潰遷滅寇將軍文欽來降奉迎之敗魏軍於高亭進封安豐侯
孫休卽位與張布誅孫綝遷大將軍加左右都護領徐州牧

志本傳

晉桓豁字朗子譙國龍亢人簡公彝之第三子溫之弟也謝萬
敗於梁濮以豁督沔中七郡軍事擊慕容廆破之進號右將
軍溫旣內鎮豁監荆揚雍三州軍事領南蠻校尉荊州刺史與
竟陵太守羅崇討破趙宏趙憶於宛城又攻僞中郎將趙盤於
宛追至魯陽獲之置戍而旋桓溫死遷征西將軍進督交廣太
元初進大將軍上疏固讓卒贈司空諡曰敬初豁聞苻堅國中
有謠云誰謂爾堅石打碎故有子二十人皆以石爲名

晉書桓
彝傳

桓祕字穆子彝第四子少有才器兄溫抑而不用久之爲宣城
內史時梁州刺史司馬勸叛入蜀祕以本官監梁益二州軍事

勳平還郡後爲散騎常侍徙中領軍孝武帝初卽位妖或溫竦入宮祕與殷康俱入擊之溫入朝窮治竦事祕反免官居於宛陵每憤憤有不平之色溫死起爲散騎常侍而弟沖位在其上祕恥位卑遂表讓不應朝命先沖卒

晉書桓彝傳

桓石虔小字鎮惡豁之子也趨捷絕倫從父在荆南獵園中虎被數箭諸將戲令拔之石虔拔得一箭虎跳石虔亦跳高過於虎復拔一箭以歸從溫入關沖爲苻健所圍垂沒石虔躍馬赴之拔沖於數萬眾中而還威震敵人時有犯瘡疾者必曰桓石虔以怖之討袁真走王鑒擒閭震逐張崇皆首功沖卒石虔以冠軍將軍監豫州揚州五郡軍事豫州刺史卒贈右將軍進爵

作塘侯

晉書桓彝傳

桓石民石虔弟也弱冠知名謝安引爲參軍叔父沖表授振武

將軍領襄城太守戍夏口與石虔攻苻堅荊州刺史梁成於竟陵又與隨郡太守夏侯澄之破慕容垂姜成於漳口復領譙國內史梁郡太守沖卒詔以石民監荊州軍事苻堅子丕僭號於河北謀襲洛陽石民遣將軍馮該討之臨陣斬丕傳首京都進

左將軍卒

晉書桓彝傳

齊王廣之字士林沛國相人初隨劉劭征伐合肥戍阻兵爲寇劭宣令求征合肥者賞以大郡廣之曰若得將軍所乘馬判能制之劭卽推鞍與之合肥果拔初封蒲圻子後以功位給事冠軍將軍改封甯都縣子齊高帝廢蒼梧出廣之爲徐州刺史建元元年進爵爲侯武帝卽位累遷右衛將軍散騎常侍前軍將軍延興元年爲豫州刺史後封應城縣公卒贈車騎將軍諡曰

壯

南史本傳

梁裴之高字如山壽陽人少隨叔父邃征討所在有功壽陽之役邃卒於軍之高隸夏侯夔平壽陽除梁郡太守封都城縣男侯景之亂之高入援及城陷退還合肥元帝召之到江陵以爲侍中護軍將軍時之高弟之悌在侯景軍中或傳之悌斬侯景元帝使黃羅漢報之高之高無言直云賊自殺賊非我所聞帝深嗟其切直卒諡曰恭

南史裴邃傳

陳裴忌字無畏之高弟之平之子之平在梁亦以軍功封費縣侯忌聰敏有識量侯景之亂招集勇力隨陳武帝征討及武帝殺王僧辨其弟僧智據吳郡黃他攻之不能克忌勒部下自錢塘直趨吳郡夜至城下鼓譟薄之僧智驚輕舟奔杜龕忌入據城武帝嘉之授吳郡太守天嘉元年封東興縣侯後與吳明徹北伐軍敗見囚於周至隋卒

南史裴邃傳

五代梁馬嗣勳濠州鍾離人朱溫攻濠州刺史張遂遣嗣勳持牌印降之楊行密來攻遂又使嗣勳求救於溫未至而濠已沒嗣勳無所歸乃甯事溫爲宣武軍元從押衙溫攻鳳翔至華州使嗣勳入說韓建建卽降羅紹威欲自誅其牙軍乞助於溫溫女嫁魏適死乃遣嗣勳以千人爲綵輿入魏致兵器於輿中聲言助葬乃夜攻牙軍牙軍不知兵所從來莫能爲備殺之皆盡嗣勳亦中重創卒溫卽梁位贈太保

五代史本傳

唐丁會字道隱壽春人與朱溫從黃巢爲盜溫鎮宣武以爲都押衙李罕之以晉兵圍河陽張全義告急於梁乃遣會及葛從周救之大敗罕之於流水又從攻魏破黎陽敗魏將羅宏信於內黃梁攻徐州別遣會攻宿堰汴水浸東城降其刺史張筠充州刺史朱瑾攻單父會又敗之於金鄉然會畏溫之雄猜常稱

疾天復元年溫起會爲昭義節度使昭宗遇弒會率三軍縞素發喪遂降於晉晉王賜之甲第位諸將上天祐七年以疾卒莊

宗卽位贈太師

五代史本傳

宋王惟忠鍾離人高宗初淮南盜賊蜂起惟忠據韭山壘石爲城民依之者九萬餘人以孫興知濠州惟忠不從率眾歸節制

劉位爲左軍統領

繫年錄南唐志江

周虎字叔子臨淮人

四朝聞見錄云平江人

開禧二年知和州十一月戊

戌金兵圍城急虎部分將士乘城拒守母何氏年九十期與虎

偕亡虎益奮勵屢戰斬其驍將十二月癸丑金人引去虎推功

歸母封永國太夫人虎轉和州防禦使追諡忠惠

宋史甯宗紀江南通志

元杜昌濠人至正閒以義兵應募有功擢汝州同知安豐等處

萬戶弟亨亦以功授泗濠義軍萬戶沒於所事

江南通志鳳陽縣志

阮懷遠縣志作院

者都萬戶扎古反子也世居荆山冀父爵守禦浙東

時盜起海上都奮力擒捕悉平之以功擢浙東道都元帥卒於

官子彞哥兒襲勇邁英銳有父風焉

江南通志懷遠縣志

明常遇春字伯仁懷遠人歸太祖於河陽請爲前鋒未許及兵

薄牛渚磯距磯三丈莫能登遇春飛舸至麾之前應聲直進敵

接其戈乘勢躍上大呼跳盪元軍披靡諸將乘之遂拔采石取

太平破蠻子海牙下池州歷遷行省都督馬步水軍大元帥陝

友諒薄龍灣以五翼軍設伏大破之先是太祖所任將帥平章

邵榮右丞徐達與遇春而三榮尤善戰忽萌異志太祖欲宥其

死遇春進曰人臣以反爲名臣義不與其生乃斬榮而愈愛重

遇春從伐陳友諒大戰於康郎山太祖舟膠於淺友諒驍將張

定邊直犯太祖舟遇春射中定邊乃得脫轉戰三日友諒死師

還第功最明年吳國建進平章政事復攻武昌降陳理拜副將
軍伐吳破閭門以入吳平進中書平章軍國重事封鄂國公復
拜副將軍與大將軍徐達北征入元都攻太原走擴廓帖木兒
遂拔開平元帝北走追奔數百里獲其宗王慶生及平章鼎住
等師還次柳河川暴疾卒年僅四十太祖聞之大震悼喪至親
輿贈太保中書右丞相追封開平王諡忠武配享太廟肖像功
臣廟位皆第二子茂封鄭國公馮勝婿也洪武二十年從勝征
納哈出以不遵約束爲勝所怒增飾其罪安置龍州死弟昇改
封開國公實錄不詳其事或謂從徐輝祖征燕戰死於浦子口

明史
本傳

湯和字鼎臣濠人與太祖同里閭郭子興初起和來歸從太祖
克滁州授管軍總管時諸將多太祖等夷莫肯爲下和獨奉約

束甚謹太祖悅之從擊陳桡先降陳保二取金壇常州以和守
之大破吳軍於錫山吳平拜征南將軍與吳禎討方國珍降之
遂與廖永忠伐陳友定執友定送京師時洪武元年正月也明
年從大將軍西征斬張良臣又明年以右副將軍敗擴廓於定
西封中山侯四年拜征西將軍與廖永忠伐夏十一年進封信
國公於時帝春秋高天下無事不欲諸將典兵和從容請願得
乞骸歸故鄉帝大悅立賜鈔治第中都卒年七十追封東甌王
諡襄武和晚年益恭慎故公侯宿將多坐胡藍黨死而獨享壽
考以功名終

明史
本傳

沐英字文英定遠人父母俱故太祖與孝慈皇后憐之撫爲子
從朱姓年十八授帳前都尉從大軍征福建破分水關別破閩
溪十八寨縛馮谷保始命復姓英年少明敏后數稱其才帝亦

器重之充征西副將軍從鄧愈討吐蕃功多封西平侯又充征西將軍討西番拓地數千里尋拜征南右副將軍同藍玉從傅友德征雲南生擒元平章達里麻降右丞觀音保詔玉及友德班師而畱英守滇中入朝遣還帝親拊之曰使我高枕無南顧憂者汝英也還鎮再敗百夷降思倫發南中悉定聞皇太子薨哭極哀初高皇后崩哭至嘔血至是感疾卒於鎮年四十八軍民巷哭遠夷皆爲流涕追封黔甯王諡昭靖伯享太廟子春晟昂皆鎮雲南春字景春材武有父風英卒命嗣爵鎮雲南維摩十一寨亂遣瞿能討平之又與何福討平阿資越州遂平初思倫發降以爲麓川宣慰使洪武三十年爲其屬刀幹孟所逐來奔春受上方略以兵送思倫發令別將直搗南甸大破之幹孟乞降帝不許命春總滇黔蜀兵攻之未發而春卒以其弟晟嗣

侯建文元年比就鎮而何福已破禽刀幹孟歸思倫發亡何思倫發死諸蠻分據其地晟討平之永樂四年大發兵討交趾拜晟征夷左副將軍與張輔異道自雲南入共破多邦城擒僞王黎季犛論功封黔國公卒贈定遠王諡忠敬子斌幼嗣公爵居京師而以晟弟昂代鎮昂字景高思任發入寇擊卻之又捕斬師宗反者卒贈定遠伯諡武襄

明史本傳

馮國用定遠人與弟勝俱喜讀書通兵法太祖略地至妙山國用偕勝來歸甚見親信嘗從容詢天下大計國用對曰金陵帝王之都先拔之以爲根本倡仁義收人心勿貪子女玉帛天下不足定也太祖大悅俾居幕府典親兵委以心腹破蠻子海牙擒陳兆先下鎮江諸郡累擢親軍都指揮使卒於軍太祖哭之慟洪武三年追封郢國公肖像功臣廟位第八國用之卒勝已

積功爲元帥遂命襲兄職典親軍陳友諒偪龍灣戰石灰山勝
攻其中堅大破之從戰鄱陽下武昌克平江從大將軍北征下
山東諸州郡洪武元年又從征山西禽元右丞賈成左丞田保
保等帝悅詔勝居常遇春下湯和居勝下二年渡河趨陝西降
李思齊執張良臣陝西平明年復同大將軍出西安破擴廓凱
還論功封宋國公五年擴廓在和林數擾邊乃大發兵三道出
塞命勝爲征西將軍是役也大將軍軍不利李文忠殺傷相當
獨勝斬獲甚眾全師而還久之徐達李文忠皆卒而元太尉納
哈出屯金山數爲遼東邊害二十年命勝爲大將軍征之降其
所部二十餘萬眾帝大悅二十五年皇太孫立加太子太師練
軍山西時詔列勲臣望重者八人勝居第三帝春秋高勝數以
細故失帝意藍玉死詔還京踰二年賜死諸子皆不得嗣而國

用子誠積戰功雲南累官至右軍左都督

明史馮勝傳

傅友德宿州人初從明玉珍又從陳友諒皆不能用太祖攻江州至小孤山友德來歸帝與語奇之用爲將戰鄱陽被數創戰益力友諒死從征武昌城東南高冠山下瞰城中漢兵據之諸將莫敢前友德一鼓奪之武昌平授雄武衛指揮使從北征敗元丞相也速復從攻陝西以五十騎擊卻擴廓萬眾洪武三年從大將軍大敗擴廓移兵伐蜀克漢中論功封潁川侯明年統前將軍與湯和分道伐蜀明昇降帝自製平西蜀文盛稱友德功第一又征沙漠從出塞進封潁國公討平雲南叛蠻加太子太師二十五年出練軍山西明年召還又明年賜死嘉靖元年雲南巡撫何夢春請立祠祀名曰報功

明史本傳

吳良定遠人初名國興賜名良與弟禎從太祖起濠梁並爲帳

前鋒良能沒水偵探禎每易服爲閒諜從克江陰以良爲指揮使守之張士誠據兵江陰當其要衝士誠來寇艤艫蔽江良遣弟禎出北門與戰而潛遣元帥王子明馳出南門合擊大敗之時太祖數自將爭江楚上流與友諒角金陵空虛士誠不敢北出爭尺寸地以良在江陰爲屏蔽也良訓將練兵常如寇至暇則延儒講論新學宮開屯田在境十年封疆晏如吳平移鎮蘇州洪武三年進都督同知封江陰侯五年副邵愈平廣西叛蠻十二年齊王封青州妃良女也命良往建王府遂卒於青贈江國公諡襄烈子高嗣禎初名國寶賜名禎積功爲天興翼副元帥助良守江陰從圍平江破葑胥二門尋副湯和討方國珍追及盤嶼降之洪武元年進兵破延平擒陳友定三年命爲靖海將軍練軍海上封靖海侯七年充總兵官捕倭至琉球大洋

海上數年無寇十一年奉詔出定遼得疾輿還京師卒追封海

國公諡襄毅與良俱肖像功臣廟子忠嗣

明史本傳

康茂才字壽卿蘄人事母孝元末寇亂結義兵保鄉里太祖渡江家屬畱和州時茂才移成采石扼江渡爲常遇春所破久之始降太祖釋之命爲將以功歷帳前總制親兵左副指揮使陳友諒旣陷太平謀約張士誠合攻應天太祖知茂才與之有舊命遣使持書紿爲內應友諒問康公安在答曰守江東木橋使還太祖易之以石友諒至見橋愕然連呼老康不應退至龍灣伏兵四起大破之從征友諒援南昌戰彭蠡征武昌下平江皆有功歷遷同知大都督府事洪武元年從大將軍經略中原畱守陝州善於撫綏民立石頌德復從大將軍征定西軍還道卒追封蘄國公諡武康子鐸以父功封蘄春侯督民墾田鳳陽帥

兵平辰州蠻從北征又從征雲南卒於軍追封斯國公諡忠愍

明史本傳

丁德興定遠人太祖偉其狀貌呼爲黑丁從取洪山寨以百騎

破賊數千自是累戰有功授鳳翔衛指揮使圍平江卒於軍洪

武元年追封濟國公祀功臣廟子忠龍江衛指揮使子世襲

明史本傳

郭興一名子興濠人滁陽王郭子興據濠興隸麾下太祖在甥

館興歸心焉從圍常州晝夜不解甲者七月城下受上賞戰都

陽建策火攻征武昌圍平江有功吳平擢鎮國將軍大都督府

僉事洪武元年從取中原守潼關敗元王左丞移鎮鞏昌封鞏

昌侯十六年巡北邊召還踰年卒贈陝國公諡武宣

明史本傳

郭英興之弟也太祖親信之令值宿帳中呼爲郭四從征武昌

陳氏驍將陳同僉持槊突入太祖呼英殺之衣以戰袍從定中原又從攻太原歷河南都指揮使僉事洪武十四年從征雲南十六年復征雲南論功封武定侯二十年遣還鄉明年召還典禁兵永樂元年卒贈營國公諡威襄元孫勛榮黠有智數大禮議起勛知上意首右張璉世宗大愛幸之請以英侑享太廟廷臣持不可帝不聽英竟得侑享

明史本傳

耿炳文濠人父君用從渡江爲管軍總管援宜興與張士誠兵爭柵力戰死炳文襲職領其軍取廣德進攻長興克之長興據太湖口陸通廣德與宣歙接壤爲江浙門戶太祖大喜改爲長安州立永興翼元帥府以炳文爲總兵都元帥守之又改爲永興衛親軍指揮使司長興爲士誠必爭地炳文拒守凡十年以寡禦眾大小數十戰戰無不勝士誠迄不得逞吳平進大都督

府僉事洪武三年封長興侯至末年公侯且盡而炳文以元功
宿將朝廷倚重建文元年燕兵起以炳文爲大將軍北伐爲燕
所敗召歸燕稱帝之明年自殺子濬永樂初杜門稱疾坐罪死
明史本傳

按明史紀事本末言炳文歿於陣嘉定錢大昕作養新錄亦
言劉三吾爲炳文墓碑歿於陣與史異存之以備考

華雲龍定遠人聚眾居韭山太祖起兵來歸與諸將同功歷豹
韜衛指揮使從克淮安使守之改淮安衛指揮使從北征克元
都擢大都督府僉事總六衛兵畱守兼北平行省參知政事洪
武三年論功封淮安侯上言北平邊塞東自永平薊州西至灰
嶺下隘口一百二十一相去二千二百里其王平口至官坐嶺
隘口九相去五百餘里俱衝要宜設兵紫荆關及蘆花山嶺尤

要害宜設千戶守禦所從之建燕邸增築北平城皆其經畫召

還道卒子中襲

明史本傳

張龍藻人從太祖渡江以功擢威武衛指揮僉事從平山東河南克潼關爲副留守洪武三年調守鳳翔改鳳翔衛指揮大敗賀宗哲進克鳳州封鳳翔侯子麟尙福清公主授駙馬都尉

明史本傳

胡海字海洋定遠人來歸從征敗元將賈魯海驍勇屢戰屢傷手足胸腹間金瘡皆徧而戰益力太祖壯之從沐英征雲南海以夜四鼓渡河繞點蒼山後攀大樹緣崖而上立旗幟英士卒望見皆踴躍大呼遂斬關入論功封東川侯

明史本傳

張赫臨淮人以義兵來歸屢戰有功洪武元年歷遷福州都指揮使倭寇出沒海島沿海居民苦其剽掠赫所捕獲不可勝計

最後迫至琉球大洋擒其魁十八人獲倭船十艘會遼東漕運艱軍食失期命督海運封航海侯病卒追封思國公諡莊簡子榮從征雲南有功爲水軍右衛指揮使

明史本傳

張銓定遠人以功爲指揮僉事從周德興征五溪蠻平之從征雲南功最多封永定侯世襲指揮使

明史本傳

顧時字時舉濠人從渡江功多歷大都督府副使從大將軍定河南北浚牖以通舟師自臨清至通州下元都徐達還京命時將騎兵下靜甯州走賀宗哲西邊悉平封濟甯侯卒葬鍾山追封滕國公諡襄靖耐祭功臣廟子敬嗣侯以左副將軍平龍泉

山寇有功

明史本傳

陳德字至善濠人戰鄱陽太祖舟膠於淺德身被九矢力戰不退北征克汴梁立河南行都督府以德署府事征山西至秦州

追擒元守將呂國公又破據廓於古城降其卒八萬封臨江侯

卒追封杞國公諡定襄子鏞襲

明史本傳

王志臨淮人以功歷親軍衛指揮使改六安衛守六安封六安侯用兵西南皆以偏將軍從雖無首功然持重未嘗敗衄卒追

封許國公諡襄簡子威嗣

明史本傳

唐勝宗濠人太祖起兵勝宗年十八來歸從渡江戰功同諸將

洪武三年封延安侯十四年浙東山寇葉丁香作亂命總兵討

之擒其首併其黨三千餘人分兵平安福賊至臨安降元右丞

兀卜台等十五年巡視陝西督屯田簡軍士明年鎮遼東在鎮

七年威信大著後坐胡惟庸黨死

明史本傳

陸仲亨濠人從太祖渡江功同諸將封吉安侯後坐胡惟庸黨

死仲亨年十七從征至封侯帝嘗曰此我初起時腹心股肱也

竟坐誅

明史本傳

鄭遇春濠人遇霖之弟也遇霖戰死遇春領其眾從平陳友諒身先士卒未嘗自言功太祖異之取六安爲六安衛指揮僉事從定山東河南克朔州改朔州衛指揮副使洪武三年封滎陽侯明年命駐臨濠開行大都督府坐累奪爵尋復之二十三年

坐胡黨死

明史本傳

周德興濠人與太祖同里少相得從渡江歷位至湖廣行省左丞同楊璟討廣西攻永州敗元平章阿思蘭及周文貴斬朱院判追奔至全州遂克之廣西平功多洪武三年封江夏侯以平蠻將軍討平慈利土酋覃屋長沙洞蠻等明年伐蜀副湯和爲征西左將軍克保甯蜀平諭功帝以和功由德興且追數覃屋之役無與德興比者復副鄧愈爲征南左將軍出南甯平焚鳳

安田諸蠻功復出諸將上命署中立府行大都督府事五溪蠻
亂德興已老力請行帝壯而遣之至則蠻悉散走德興在楚久
威震諸蠻決荆山嶽山壩以溉田歲增官租四千三百石楚人
德之還鄉居無何帝謂德興福建功未竟卿雖老尙勉爲朕行
德興至閩相視要害築城十六置巡司四十有五防海之策始
備後坐其子驥有罪死

明史本傳

王弼定遠人徙居臨淮初依三臺山樹柵保鄉里帥所部來歸
戰比有功從圍平江士誠親率銳士出西門搏戰奔常遇春軍
遇春拊弼背曰爾稱健將能爲我取此乎卽馳騎揮雙刀出遇
春乘之吳兵大敗士誠墮水幾不救自是不敢復出吳平賞賚
甚厚洪武三年授大都督府僉事十一年副沐英征西番功多
封定遠侯十四年從傅友德征雲南擒土酋段世又從馮勝降

納哈出從藍玉走元嗣主脫古思帖木兒後坐藍黨死

明史本傳

藍玉定遠人初隸常遇春帳下遇春素稱之由管軍鎮撫積功至大都督府僉事洪武四年從伐蜀五年從北征十一年討西番並有功師還封永昌侯十四年以征南右副將軍從傅友德征雲南擒元平章達里麻梁王走死滇地悉平玉功爲多二十一年以左副將軍從馮勝征納哈出乘大雪率輕騎襲慶州殺平章果來擒其子不蘭溪受納哈出之降馮勝有罪代爲大將軍移屯薊州二十一年出大甯至慶州諜知元主在捕魚兒海兼程進去海四十里不見敵欲引還王弼不可遂乘夜至海南知敵營尙在海東北八十里疾馳薄其營會大風揚沙敵無所覺猝至前大驚迎戰敗之殺太尉蠻子等元主與太子天保奴遜去獲其次子地保奴妃公主以下百餘人奏捷京師帝大喜賜

敕褒勞比之衛青李靖師還進涼國公二十六年指揮蔣璿告

王謀反族誅公侯以下坐夷滅者至萬五千人於是元功宿將

相繼盡矣

明史本傳

曹震濠人以征西番功封景川侯永甯宣慰司言所轄地有百

九十灘其八十灘道梗不通詔震疏治之震鑿石削崖令深廣

以通漕運在蜀久規畫周詳蜀人德之藍玉敗論其黨以震爲

首並其子炳誅之又張翼臨淮人父聚從平江南淮東以功爲

大同衛指揮同知致仕翼嗣父職以功封鶴慶侯又陳桓濠人

以功封普定侯皆坐藍黨死

明史藍玉傳

謝成濠人以功封永平侯坐事死

明史本傳

李新濠人從太祖渡江數有功累遷至中軍都督僉事洪武十

五年以營孝陵功封嵩山侯二十二年命改建帝王廟於雍鳴

山新有心計將作官吏視成畫爾已二十六年督有司開騰脂河於溧水西達大江東通兩浙以濟漕運河成民並便之二十

八年坐事死

明史本傳

吳幹臣定遠人太祖伐張士誠以指揮使從大將軍徐達率馬步舟師由港口取湖州幹臣勒奇兵出舊館扼之戰大捷事平遂畱戍焉時方國珍據明州未下以爲征南副將軍從御史大夫湯和往平之洪武元年海寇葉陳二姓聚劫蘭秀山幹臣調兵立剿之三年封靖海侯

浙江通志新增

繆大亨定遠人初糾義兵爲元攻濠元兵潰大亨與張知院屯橫湖山固守太祖夜襲其營破之比明復陣以待太祖遣其叔貞諭降之從征有功擢元帥總兵取揚州克之降青州元帥張明鑑遷同僉樞密院事總制揚州鎮江大亨有治略寬厚不擾

民甚悅之未幾卒太祖過鎮江歎曰繆將軍生平端直未嘗有

過今不見矣遣使祭其墓

明史本傳

武德安豐人

潁州府志云霍邱人

元末爲義兵千戶知元將亡來歸隸李

文忠從戰池州矢中右股戰自若又敗苗帥楊完者每陷陣受傷不顧文忠歎曰將士人人如此何戰不捷進管軍千戶世襲

明史繆大亨傳

孫怡濠人燕山侯興祖之子也從藍玉北征以功封金陵侯恪

謹敏有儒將風亦以藍黨死

明史孫興祖傳

甯正字正卿壽州人幼爲韋德成養子隨德成來歸德成戰歿於宣州以正領其眾積功爲鳳翔衛指揮副使洪武三年授河州衛指揮使正初至衛城邑空虛勤於勞來不數年遂爲樂土始復甯姓兼領甯夏衛事修築漢唐舊渠引河溉田開屯數萬

項十三年從沐英北征取金甯四部雲南思倫發亂正破之於
摩沙勒寨已復從沐英分兵三隊正將左大敗之英卒詔爲左
都督代鎮已復命總川陝兵討平階文叛寇張者二十九年卒

明史
本傳

謝彥鳳陽人數從征討有功累官前軍都督僉事子達尙太祖

女汝陽公主

明史公
主傳

潘毅臨淮人洪武初以戰功授虎賁衛指揮使再從西征道卒

江南
通志

孫岳鳳陽人洪武初以勲舊任雷州衛鎮撫從學趙考古機謀
智勇而廉靜有守始終如一疆宇初闢疊著先登功遠近懾其

威名

廣東通志
新增

何福鳳陽人洪武初累功爲金吾後衛指揮同知二十二年討

平都勻蠻二十四年破降越州叛蠻遂平九名九姓畢節諸蠻三十年從沐春討麓川刀幹孟春卒福破擒之麓川悉定建文元年還京師論功進都督同知與平安盛庸會兵伐燕不利成祖卽位推誠用之充總兵官鎮甯夏節制山陝河南諸軍四年移鎮甘肅七年降迤北王子國公司徒以下十餘人福親至亦集乃撫之送其會長於京師封留遠侯後陳瑛劾其罪自縊死

明史本傳

朱能字士宏懷遠人父亮從渡江以功至燕山護衛副千戶能嗣職事燕卽嘗從北征降元太尉朶兒不花燕師起有大功封成國公永樂二年兼太子太傅四年以征夷將軍討安南卒於軍追封東平王諡武烈洪熙時配享成祖廟庭子舅嗣

明史本傳

張恕鳳陽人洪武初由父勳任山西護衛揮僉升同知調海南

衛敦篤謙和涉獵子史永樂五年征潯州等處十六年督築南山新城皆有功時有定遠楊義亦以父勳襲河南衛指揮同知升揮使亦調海南衛多才有守軍民畏愛

廣東通志
新增

宋晟定遠人朝用次子國興之弟國興戰歿朝用請老晟襲父官累進都指揮同知歷鎮江西大同陝西洪武十七年討西番叛酋俘獲萬八千人二十四年討哈梅里收其部落輜重以歸番戎懽服建文改元鎮甘肅永樂初入朝封西甯侯凡四鎮涼州前後二十餘年威信著於絕域

明史
本傳

陳懋壽州人父亨建文時爲都督僉事燕師起與劉眞卜萬守大甯以計囚萬因襲眞而降燕旋爲燕與平安戰鐔山受重創輿還而死燕王自爲文祭之卽位後追封涇國公諡襄敏長子恭嗣都督同知懋其少子也永樂元年封甯陽伯六年鎮甯夏

明年降故元丞相胥卜及平章司徒國公知院十餘人已而不
章都連等叛去懋追擒之黑山八年十一年二十年皆從北征
明年從征阿魯台爲前鋒又明年復領前鋒從北征上崩於榆
木川仁宗召懋與薛祿帥精騎三千馳歸衛京師命掌前府加
太保與世侯卒贈濟國公諡武靖

明史陳亨傳

孫巖鳳陽人官燕山中護衛千戶永樂初以功封應城伯卒贈
侯諡威武又陳賢壽州人歷燕山右護衛指揮僉事燕師起從
諸將轉戰常突陣陷堅軍中稱其驍勇論功封榮昌伯張興壽
州人爲燕山左護衛指揮僉事從起兵功多累遷都指揮同知
封安鄉伯

明史本傳

李彬字質文鳳陽人父信從太祖渡江積功爲濟川衛指揮僉
事彬嗣職從傅友德出塞築諸邊城燕師起彬迎降永樂元年

封豐城侯四年充總兵官備倭海上移師擒長沙賊李法良十年命往甘肅與宋琥經略降酋明年代琥鎮甘肅縛涼州叛酋老的罕以獻賜資甚厚十五年鎮交趾時交趾人反者四起彬遣諸將分道往討而尤劇者輒自將往擊諸賊略平惟黎利數出沒潯江將發兵入老撾索之會疾作罷明年卒贈茂國公諡剛毅子賢嗣宣德三年從出塞正統初鎮大同尋守備南京卒

贈豐國公諡忠憲

明史本傳

費璵定遠人祖愚爲燕山中衛指揮使傳子肅至璵從燕起兵累進後軍都督僉事永樂八年擊涼州衛叛人虎保永昌衛叛人亦令眞巴等追奔至北角海斬獲無算十二年充總兵官鎮甘肅宣宗嗣位封崇信伯征高煦有功復鎮甘肅卒於鎮子釗

嗣明史
本傳

李達定遠人以功官都督僉事鎮洮州至四十餘年蕃漢畏服

正統中致仕

明史史
昭傳

郭登字元登濠人武定侯英孫也正統中從王驥征麓川有功
又從沐斌征騰衝歷署都指揮僉事十四年扈從北征至大同
拜都督僉事佐劉安鎮守朱勇等軍覆登告曹鼐張益曰車駕
宜入紫荆關王振不從遂及於敗是時人心洶洶登慷慨登陴
誓與城共存亡景帝監國代安爲總兵官景泰元年偵知寇自
順聖川入以八百人躡之大破其眾軍氣一振封定襄伯初也
先欲取大同爲巢穴故數來攻及每至輒敗始有還上皇意二
年以疾召還成化八年卒贈侯諡忠武登事母孝居喪秉禮能

詩明世武臣無及者

明史
本傳

鄧安定遠人官福州都指揮僉事鄧茂七攻劫郡邑民多避地

入城羣不逞者乘機為姦安捕殺首惡嚴守禦以備之一方遂

安

福建通志

顧斌懷遠人世襲漳州衛指揮僉事鄧茂七黨楊福率眾圍漳以雲梯攻城勢危甚斌時督兵備倭海上夜率五百人航海來援突圍入城募死士迎戰斌躍馬大呼以百騎直壓賊壘麾死士為兩翼以巨斧砍之賊大敗去明日復益兵來攻又破逆賊

遂遞擢都指揮僉事

福建通志

官顯壽州人任福建建甯衛指揮僉事正統十四年沙尤寇攻將樂城顯設備俟賊少懈襲破之升指揮同知子鎧嗣任歷遷

邵武衛同知

福建通志 新增

李春鳳陽人正統間為邵武巡檢沙寇突至城南親冒矢石為士卒先連射皆中賊驚遁後累有提兵討賊功

福建通志

趙輔字良佐鳳陽人襲職爲濟甯衛指揮使成化元年以征夷將軍與韓雍討兩廣克大藤峽還封武靖伯三年總兵征迤東從撫順深入有功進侯卒贈容國公諡恭肅子承慶嗣伯明史本傳戚繼光字元敬定遠人世襲登州衛指揮僉事父景通官都指揮入爲神機坐營繼光襲職用薦署都指揮僉事以參將備倭浙東練金華義烏兵因地形製陣法大破倭於台州以副總兵鎮福建大破倭於平海衛復興化廕同安殲餘賊於漳浦闖寇悉平召爲神機營副將以都督同知總理薊州昌平保定三鎮升總兵築牆堡立車營東西邊二寇土蠻長昂不敢入犯進左都督加秩少保移鎮南粵踰二年得請還登州卒諡武毅明史本傳

定遠縣志

神英字景賢壽州人天順初爲延安衛指揮使從都督張欽征

計有功成化間以征滿四功遷都指揮使進參將屢敗亂加恩

蘭兵進都督僉事充總兵官鎮守甯夏後封涇陽伯

明史本傳

趙榮定遠人成化間任福建北路烽火寨欽依把總屢平劇盜

有渠魁口銜刀左右手各執一刀飛侵榮舟榮迎砍之遂入賊

舟擒斬殆盡自是海寇膽落

福建通志新増

戴紹印鳳陽人自萬戶侯擢三江總戎致仕萬歷丁酉日本關

白犯朝鮮命兵部尚書邢玠總督征之紹印杖策從畫平倭十

策卒覆倭以過勞驟卒巡撫褚鐵檄郡建祠

江南通志

沈思學宿州人嘉靖甲寅流寇師尚詔圍城思學單騎突入賊

營潰圍而出賊驚遁以勇薦舉備倭通泰之戰賊乘風進巡撫

李燧

明史作遂

擢甲誓死思學揮戈直前遂平倭升狼山鎮總兵都

督僉事

宿州志

國朝宋元俊字甸芳懷遠人以武進士歷四川阜和營遊擊乾隆三十六年金川曾索諾木襲殺革布土司其黨小金川曾亦發兵侵明正土司據班爛山總督阿爾泰命元俊責賊問故索諾木詭以革番內變爲辭元俊知其詐歸告曰兩酋犄角爲姦非大創不可卽獻進兵之策奏聞

上命副將軍溫福提督董天弼分路進兵總督阿爾泰居中控制密令參將薛綜扶巴魯擊山梁而元俊從甲楚渡河攻之賊腹背受敵大驚奔潰遂破甲金達收復班爛山擢松潘總兵進討金川率遊擊吳錦江等由節木郭渡河據勺藏橋而密使革布番民約結內應舉礮爲號同時夾攻擊斬千餘人進圍丹東角洛收復革境三百餘里以兵少持重不肯輕進爲制府劾革職卒於軍籍其家二子戍邊有張芝者爲麾下參將四十一年大將軍

阿桂平定金川芝書元俊戰狀哭軍門將軍奏聞蒙

恩赦其子歸

袁枚小倉山房集 懷遠縣志

王大壯字烈文懷遠人以武進士發浙江候補守備捕獲濱海盜賊無算以薦遷嘉順營都司乾隆三十六年征兩金川松潘鎮總兵宋元俊薦其才可用題署建昌中營遊擊權總兵事建昌東接涼山諸蠻時出剽掠竊漢民童穉爲奴婢漢民犯罪者逃入則匿之會長安士依陸世采尤凶狡不法以縣役奪蠻物擁眾屯城東大壯自往撫諭挺刀厲至大壯叱之皆辟易不敢動遂縛兩酋以歸將斬之其頭人十四酋捧香爲乞命大壯設軍容召之跪階下數其罪與之約曰能遵賞罪皆感泣聽命乃杖二酋而遣之立反童穉遁逃數百人一境歡呼金川凱旋授貴州撫標右營遊擊四十六年四川囑噶嘯聚侵軼及滇境巡

撫檄大壯以兵二百往援之疾馳至遵義卽大呼馳之賊披靡
得入城見官兵少明日復合圍大壯誘之前發所自製滾地神
雷火器擊之大敗之賊夜遯窮追至蜀之合江縣復殺數百人
遷朗洞營參將丁母憂歸哀毀成疾未畢喪而卒

姚鶴松川志稿懷遠縣

志

徐大鵬靈璧人乾隆庚寅武解元成戊戌進士授廣東羅定協
右營守備從征臺灣擒賊匪莊大田旋以從征安南功補督標
中營都司嘉慶元年進剿湖南苗匪升廣西右江遊擊以疾歸
七年病痊領鄉勇堵剿宿州逆匪王朝名復起用蒙

恩賞戴花翎補易州營遊擊署河間協副將

舊志

賈鮎字靈淵壽州人自行伍擢鳳臺縣把總擒劇盜遷無爲州
千總又以獲潁州姦民程八等十三人功升陝西興安營守備

時白蓮逆匪倡亂連楚蜀秦豫之境魴隨提督帶兵敗賊於四
川麻柳壩刺朋溝西安距興安七百餘里賊首張漢潮擁數萬
人出沒鎮安山陽間魴轉餉十餘萬漸近賊砦夜聞軍聲如潮
火光迸起眾恐懼欲逃魴按劍呼曰死耳會得驛遞人於草間
知有僻徑遂達興安以勤攝白土關都司奉檄守五塊石江口
江淺可涉賊每夜至魴以巨礮擊之賊不敢渡沿漢屯兵數萬
餉不時至卒有饑色日夜撫循眾感而不怨竟以勞染疫卒於
軍

壽州志
以上舊志

秦攀萼字棣堂宿州人嘉慶七年由武生從征教匪王潮名拔
補把總隸兩江督標疊次緝獲海盜鹽梟及剿滅刁李二圍賊
穴歷升河標副將以總兵用署狼山鎮捐修掘港一帶海口礮
臺調徐州鎮獲糧船巨匪正法積勞病卒

宿州志
以下新修

康錦文懷遠人歷從袁甲三僧格林沁轉戰皖豫東楚屢著勞積官至總兵加提督銜同治五年帶兵防潁州沙河北岸舟覆而死奉

旨優卹祀昭忠祠

懷遠縣志

張佩芝壽州人歷剿髮捻有功又帶勇攻克湖北黃陂縣轉戰山東安邱濰縣等處累保總兵勇號同治十二年在營傷發病故奏請

旌卹

李鴻章奏案

潁州府

魏曹仁字子孝沛國譙人操從弟也祖褒潁川太守父熾侍中長水校尉漢末豪傑並起仁從操爲別部司馬破袁術攻陶謙擒呂布平黃巾迎天子都許皆有功拜廣陽太守不之郡以議

郎督騎封都亭侯從平荊州行征南將軍畱屯江陵吳將周瑜來攻仁使牛金挑戰爲所圍仁自將數十騎救之乃得解眾服其勇轉封安平亭侯少不修行檢及長爲將嚴整奉法令鄢陵侯彰北征烏丸文帝時在東宮以書戒之曰爲將不當如征南耶後進封陳侯卒諡曰忠子泰嗣

三國志本傳

曹純字子和仁之弟也好學愛士爲遠近所稱初以議郎參司空軍事督虎豹騎從圍袁譚於南皮士卒多死欲議緩之純不可遂急攻之斬袁譚及北征三郡純部騎獲單于踰頓以功封高陵亭侯建安十五年卒追諡威侯

英雄記三國志曹仁傳

曹洪字子廉操初起義兵討董卓爲徐榮所敗失馬追甚急洪以己馬授之曰天下可無洪不可無公遂步從到汴水循水得船還奔譙及天子都許封明亭侯文帝卽位累封徙都陽侯洪

富而性吝文帝少時假求不稱恨之遂以舍客犯法下獄當死羣臣莫能救下太后怒曰梁沛之閒非子廉無有今日乃得釋後更封樂城侯卒諡曰恭子馥嗣

魏略三國志本傳

曹休字文烈操族子少孤年十餘歲將母至吳聞義兵起閒行北歸操見之謂左右曰此吾家千里駒也常從征伐領虎豹騎宿衛文帝卽位封東陽亭侯擊破吳將於歷陽領揚州刺史進安陽鄉侯又擊吳大將呂範於洞浦破之拜揚州牧明帝卽位進封長平侯擊斬吳將審意於皖遷大司馬太和二年征吳爲吳所誘深入敗還癰發背卒諡曰壯子肇嗣

三國志本傳

曹眞字子丹操之族子父邵從起兵爲州郡所殺憐其少孤收養與諸子同文帝卽位封東鄉侯張進等反於酒泉眞使費耀擊斬之黃初三年以眞爲大將軍敗吳軍於牛渚蜀降南安天

水安定三郡眞復之遷大司馬卒諡曰元子爽嗣爲司馬懿所

殺

三國志本傳

曹彰字子文文帝母弟數從征伐志意慷慨封鄴陵侯建安二十三年代郡烏丸反以彰爲北中郎將行驍騎將軍北征入涿郡界兵馬未集敵數千騎卒至用田豫計固守俟其退散身自搏戰乘勢逐北至於桑乾去代二百餘里諸將皆以爲士馬疲頓不可深進彰不可遂上馬令後出者斬一日一夜與敵相及大破之黃初二年進爵爲公三年立爲任城王四年朝京師卒於邸諡曰威子楷嗣

三國志本傳

夏侯淵字妙才沛國譙人曹操初起以別部司馬騎都尉從遷陳畱潁川太守屢從征伐破袁紹擊韓遂所向有功封博昌亭侯抱罕宋建因涼州亂自號河首平漢王淵率諸將討之月餘

遂拔枹罕斯建操下令曰宋建亂逆三十餘年淵一舉滅之虎

步關右所向無前仲尼有言吾與爾弗如也西征張魯漢中平

留淵守之先主軍陽平關淵拒之爲所襲戰死諡曰愍

三國志本傳

許褚字仲康譙人勇力絕人嘗以一手逆曳牛尾行百餘步淮

汝陳梁閒皆畏憚之以眾來歸操一見壯之曰此吾之樊噲也

卽日拜都尉從討韓遂馬超以潼關兵盡渡河操獨與褚留南

岸斷後超兵大至褚扶操上船左手舉蓋蔽矢右手挾櫓沂船

僅乃得濟是日微褚幾殆後與遂超會語超負其力欲前突疑

從者爲褚因問曰聞軍中有虎侯今安在操顧指褚褚瞋目視

之超不敢動軍中號曰虎癡文帝卽位遷萬歲亭侯明帝時進

牟鄉侯卒諡曰壯

三國志本傳

吳呂據字世議汝南細陽人大司馬範之子也爲安軍中郎將

數討山賊諸深惡劇地所擊皆破歷位至右將軍魏出東興據戰有功五鳳二年破魏將曹珍於高亭太平元年帥師侵魏未及淮聞孫峻死以從弟緄白代據大怒引軍還欲廢緄緄聞之使中書奉詔詔文欽等取據左右勸據降魏據曰恥爲叛臣遂

自殺

三國志呂範傳

陳任忠汝陰人侯景之亂隨晉熙太守梅伯龍討景將王貴於壽春每戰卻敵梁亡入陳屢有功太建五年北伐忠出西道擊走齊歷陽王高景安於大岷襲合肥克霍州十二年生擒周將王延貴加封信都郡公隋兵濟江陳亡入隋卒

陳書本傳

唐江子建信州人隋末兵起所在殘破子建設柵禦賊鄉井獲安武德初以其保護功卽命爲本州刺史

江南通志

按唐武德四年始以汝陰郡置信州六年卽廢仍名潁州子

建旣不得云信州人又不當云武德初爲信州刺史也未知所據

王敬蕤潁州汝陰人事州爲牙將唐末王仙芝攻劫汝潁開刺史不能拒敬蕤遂代之卽拜刺史沈勇有力善用鐵鎗潁數爲秦宗權所攻力戰拒之河南諸州悉陷獨潁不可下傍近州民皆依以避賊朱溫攻淮南過潁敬蕤供饋甚厚溫喜表爲沿淮指揮使後梁攻吳龐師古死清口敗兵過潁值大雪敬蕤沿淮置薪作糜粥饋之多所全活溫表爲武甯軍畱後遂拜節度使溫篡唐敬蕤以疾致仕卒於家

五代史本傳

按五代史入敬蕤於雜傳敬蕤未爲梁官猶唐臣也故仍附之於唐

五代梁張存敬譙人少事朱溫爲將溫攻徐兗以存敬爲行營

都指揮使攻滄州敗劉仁恭於老鴟隄還攻王鎔於鎮州遷宋

州刺史復從攻幽州取瀛漠祁景四州攻定州大敗王處直於

懷德又攻河中降王可溫表爲護國軍畱後卒贈太傅

五代史本傳

徐懷玉亳州焦夷人少事朱溫以雄豪自任爲永城鎮將秦宗

權攻梁壁金隄靈昌酸棗懷玉以輕騎連擊破之又破之於板

橋赤岡拔其八柵從破徐宿金創被體戰必克捷所得賞賚以

分士卒爲時名將又從攻兗破朱瑾於金鄉從攻楊行密龐師

古敗清口懷玉一軍獨完遷沂州刺史天復四年以兵迎昭宗

都洛陽遷華州觀察畱後又敗晉於洪洞拜保大軍節度使本

名琮溫賜名懷玉後朱友謙附於晉襲懷玉殺之

五代史本傳

楊師厚潁州斤溝人從李罕之歸晉無所知奔於梁朱溫以爲

宣武軍押衙曹州刺史攻王師範破趙匡凝功多拜山南東道

節度使同中書門下平章事又克劉知俊於長安敗周德威於蒙阮遷保義軍節度使徙鎮宣義溫遇殺友珪自立以師厚爲天雄軍節度使已而與友貞同謀討友珪殺之友貞立封師厚鄴王瘍發卒

五代史本傳

宋田欽祚潁州汝陰人仕周爲供奉官宋初遷閣門通事舍人蜀平後土寇亂遣欽祚討平之并人寇樂平以所部破寇擒副將一人遷西上閣門使又破賊兵牙石嶺關領賀州刺史朝廷議征江表遣欽祚覘之還奏合旨師興首命欽祚與曹彬李漢瓊率騎軍先赴江陵就命爲昇州西南路行營馬軍兼左廂戰權都監敗吳軍於溧水斬其帥李雄等五人擒裨將二人南唐平以功加汾州防禦使太平興國初爲晉州都鈐轄敗太原驍將楊業於洪洞四年從征太原護前鋒騎屯石嶺關以扞契丹

病卒

宋史本傳

丁罕潁州人應募補衛士累遷指揮使從劉廷翰戰徐河以奪橋功遷本軍都虞候洎化三年出爲澤州團練使知霸州會河溢壞城堡罕以私錢募築民咸德之五年爲容州觀察使敗李繼遷俘獲萬計拜密州觀察使知威虜軍徙貝州卒子守德能世其家

宋史薛超傳

高瓊亳州蒙城人嘗有罪逃事王審琦太宗尹京邑知其材勇召置帳下後卽位擢御龍直指揮使出爲許州馬步軍都指揮使會有龍騎亡命卒數十人因知州臧丙出郊謀劫其導從以叛瓊聞卽單騎追捕至榆林村賊首青狐狼者注弩將射瓊瓊一發斃之悉擒送州丙上其事召還積功爲保大軍節度眞宗卽位加彰信軍節度景德元年契丹內侵寇準請親征帝幸澶

州及至南城眾請駐蹕準力爭不能決出遇瓊於屏謂曰太尉受國恩今日有以報乎瓊對曰願效死即入奏曰敵師已老陛下宜親往以督其成即麾衛士進輦帝遂渡河御北門城樓遠近望見御蓋踴躍歡呼聲聞數十里契丹相視驚愕不能成列乃請盟是役也準之功而得瓊之力爲大未幾以久疾解兵柄授檢校太尉忠武軍節度卒年七十二贈侍中瓊不識字善訓諸子繼勳繼宣最知名

宋史本傳參用寇準傳

高繼勳字紹先瓊之子咸平中王均據益州以繼勳爲益州兵馬都監招安使雷有終授之兵五百使守東郭二門會賊攻彌牟砦繼勳轉鬪至嘉州敗之日暮更戰創血濡甲馬死再更以進均遂破滅以功遷崇義使徙鎮岢嵐軍契丹聚兵五萬屯草城川繼勳登高望之曰眾而不整將不才也乃大敗之於寒光

嶺領榮州刺史後爲昭信軍節度使以老病乞骸骨卒年七十
入贈太尉子遵甫嘉祐八年女正位皇后神宗卽位冊皇太后
累贈繼勳太師尙書令追封康王諡武穆遵甫亦贈太師尙書
令兼中書令追封楚王

宋史高
瓊傳

高繼宣字舜舉繼勳之弟也以恩補西頭供奉官遷邠州兵馬
都監曹瑋守邠數與言兵薦其可用乾興初爲益州都監蜀人
富侈元夕張燈知府薛奎戒以備盜繼宣籍惡少年飲犒之使
潛識盜背明日盡獲之歷遷恩州團練使知并州元昊寇麟府
繼宣帥兵抵天門關是夕大雨及河師半濟黑凌暴合舟不得
進乃爲文以禱凌解師濟進屯府谷募黥配廂軍二千餘人號
清邊軍令偏將王凱主之次三松嶺賊數萬圍之清邊軍駭起
斬首千餘級躡籍死者不可勝計築甯遠砦相視地脈鑿石出

泉已而城五砦逕眉州防禦使卒

宋史高瑁傳

張整字成伯亳州人初爲利文州都巡檢使邊夷歲鈔省地吏不能校反遺之物整密募死士時其來掩擊幾盡有司劾生事神宗壯之不問調荆湖將領拓溪蠻地築九城又破蠻於大田狷狺萬眾迫黔江守兵才五百整伏其半於托口旁戒曰須吾度金斗崖舉幟則譟而前旦率其半趨之賊笑不爲備幟舉伏發前後合擊殺獲不可計哲宗召對官至威州刺史卒

宋史本傳

王鑑霍邱人爲淮西兵馬鈐轄李全犯揚州鑑從趙范趙葵救之屢敗全全騎陷泥淖中遂爲我軍刺死鑑以功除鎮江都統

制封廬江郡開國侯

宋史趙葵李全傳江南通志

明劉才字子才霍邱人明興歸附歷營州中護衛指揮僉事降燕從戰有功封廣恩伯才不爲苟合亦不輕訾毀人甚爲仁宗

所重

明史陳亨傳

程寬潁上人以功官都指揮同知從張輔平交趾進都督僉事

卒追封保昌伯諡忠威

明史功臣表

曹隆潁上人從燕起兵以功官都督同知永樂九年卒宣德初

追封安陽伯諡忠毅

明史功臣表

鹿鸚潁州人兄弟五人鳳鸞鸚鵡鵬皆勇敢善射而鸚更矯健

正德七年劉六等破太和圍潁上鸚兄弟應募守城生擒賊將

李龍號萬人敵者又擒其劇賊李魁賊遂解去都御史彭澤上

其事授錦衣百戶而鸚已卒土人立廟祀之

江南通志

李栩字蓮蓮潁州人初名麟孫貢成均後改焉崇禎八年流賊

陷潁踰月栩從山東歸散財結士得三百人九月賊又至栩敗

之茨河鋪又設計擒其巨魁白虎神闖場天因甲冑見制府朱

大典請曰賊焚我先人柩誓不與俱生願得當一面殺賊大典
令栩以都司領義勇十年八月賊突至栩單騎出呼曰識李栩
否賊不敢倡栩率士夜出斫營賊渡河走追斬無算捷聞加參
將無何賊首袁時中已就撫復思叛設筵邀栩至其營數軍實
栩不疑而往酒半酣於席間害之

穎州府志

國朝楊履道字中長亳州人順治二年劉委蘇州守備隨征江南
以從剿海寇功補撫標右營中軍調征湖南廣西雲貴積功歷
直隸懷來參將升福建延平府副將剿山寇以勞成疾卒於官
子光斗庚戌武進士隨征閩以功加左都督銜任衡州衛守備
再任金山衛守備卒於官

穎州府志
亳州志

劉忠亳州人順治戊子武舉署六安守備剿六安霍邱土寇張
復還等有功升郢城守備剿平榆寇又隨使西域後以親老歸

養

亳州志
以上舊志

趙光璧字聘珍阜陽武舉直隸懷來都司嘉慶間滑縣之亂防
開州有功歷廣西參將擊破教匪於芳林渡累擢兗州營總兵
防日照海口道光中卒

阜陽縣志
新修

重修安徽通志二百三十三

人物志

武功四

滁州

隋張齋字文懿南譙州人父雙自清河太守免歸周時鄉人郭子冀密引陳寇雙欲擊之猶豫未決齋贊成其謀竟破賊由是以勇決知名賀若弼鎮江都特敕齋從平陳之役與有力焉封文安縣子率水軍破賊竿子游於京口薛子建於和州徵拜大將軍文帝命升御座謂曰卿可爲朕兒朕爲卿父尋從楊素征江表破高智慧於會稽吳世華於臨海進位上大將軍卒於潭

州總管諡曰莊

北史本傳

唐張訓滁州清流人楊行密據合肥訓往見授親兵遷黃頭都

虞侯擊舒州盜吳迴知名揚州之役訓潛入城滅餘火得穀數十萬斛以賑饑民明年擊殺甘露鎮使陳可言遂取常州授常州刺史乾甯初駐軍漣水汴將龐師古屯兵清河口訓率舟師與戰斬師古海州戍將陳漢賓請降將兵直趨其城漢賓倉皇解甲聽命天復初昭宗遣李儼封行密吳王訓以功擢司徒卒贈太傅清河郡公

十國春秋本傳

明趙奎字思義全椒人從太祖渡江有功授總管守宜興洪武五年從征甘肅力戰有功與同縣王才俱官都指揮使才亦以材武著

江南通志

何文輝字德明滁人

全椒縣志云全椒人

太祖下滁州得文輝年十四撫

爲己子賜姓朱氏以天甯翼元帥守甯國進江西行省參政擊斬新淦鄧仲廉援安福走饒鼎臣取淮東下平江進行省左丞

復其姓以征南副將軍與胡美取福建降其同僉達里麻總管翟也先不花入城秋毫無犯州縣聞風皆降又從取陝西征蜀授大都督府都督僉事世襲從北征巡居庸以疾召還卒子環成都護衛指揮使征迤北陣歿

明史本傳

平安滁人

全椒縣志云全椒人

父定從太祖起兵官濟甯衛指揮僉事從

下元都戰歿安初爲太祖養子襲職建文時伐燕從李景隆爲先鋒燕王將渡白溝河安伏萬騎邀之戰至暝互有殺傷明日復戰安擊敗房寬陳亨王幾爲安架所及李景隆敗燕兵圍濟南安渡河攻德州圍乃解又戰單家橋擒薛祿戰楊村敗李彬戰淝河斬王真進至小河又斬陳文燕軍大懼會糧運爲燕所阻謀移軍就糧遂爲燕所乘安被執永樂初爲北平都指揮使七年覽奏見安名曰平安尙在耶安聞之自殺

明史本傳

陳旭全椒人父彬指揮僉事旭嗣官爲會城衛指揮同知舉城降燕王入京師封雲陽伯永樂四年從張輔征交趾爲右參將破西都師還陳季擴叛復從輔往剿輔還又命副沐晟八年以疾卒於軍

明史本傳

方瑛全椒人都督政之子政戰死麓川瑛發憤報讐以都指揮同知隨王冀征麓川直突賊壘擊斬無算遂平其地進都指揮使討貴州羣苗擊賊香爐山大破之又平四川草塘苗黃龍韋保封南和伯湖廣苗叛拜瑛平苗將軍討之所過秋毫無犯賊渠蒙能中火鎗死遂進沅州連破鬼板天堂等數百砦留鎮貴州進爵侯瑛前後克砦幾二千俘斬四萬餘平苗之功無與比者尋卒於鎮謚忠襄

明史本傳

陳友全椒人其先自西域徙正統九年充甯夏游擊與黃眞擊

兀良哈多獲進都督僉事景泰二年與方瑛等擊賊香爐山大破之留鎮湖廣天順元年隨瑛征天堂諸苗大獲命充左副總兵又與瑛討平蒙能餘黨封武平伯孛來犯邊連戰敗之召還進侯卒後贈沔國公諡武僖

明史方瑛傳

劉昭全椒人永樂五年以都指揮同知使朵甘烏思藏建驛站還至靈藏番賊邀劫昭敗之進都指揮使鎮河州宣德二年討平松潘進都督同知劄兒加邀殺中官使西域者奪璽書金幣去命副劉廣討之劄兒加請還所掠貢馬贖罪帝以窮寇不足深治命昭等還

明史史昭傳

王撫全椒人父得從太傅徐達北征以歿撫世襲副千戶二十八年調廣西從都督楊文征奉議南丹等處以勞績遷南甯衛武緣守禦千戶所又從討平青水蠻及慶遠賊永樂四年征安

南馬平忻城等處奮勇率爲諸將先戰功懋焉卒子璵襲

廣西通志

增新

周玉字廷璧滁州人都督同知賢之子也以父死事超二官爲萬全都司都指揮同知舉將才玉爲首率所部援延綏從王越擊紅鹽池還守宣府寇入馬營赤城擊敗之小王子犯大同敗總兵官許甯寇宣府玉擊敗之白腰山未幾復入玉又敗之移

鎮甘肅病歸卒諡武僖

明史周賢傳

吳亮來安人英宗初討新淦賊有功累進都督僉事副蕭授鎮湖廣貴州破普定蠻阿遲斬貴州計沙苗總牌等進右都督正統十一年卒亮姿貌魁梧性寬簡不喜殺僇所至蠻人懷附

明史

蕭授傳

彭程全椒人祖勝從太祖征伐有功封明威將軍程襲指揮僉

事正統中寇鄧茂七據延平程往征之旬下營忽移他處其夜賊來劫見空營驚退翌日師問故程曰下營時有怪風占而知之眾其欽爲神明遂大敗賊擊斬招撫無算景泰初葉中畱叛程復大破之擒賊首五人升指揮同知

浙江通志全椒縣志

錢輅字廷用全椒人景泰中海寇嚴啟盛恃險爲亂輅率舟師追七日夜至黑水洋大小十一戰賊敗遯復征沙尤寇斬酋蕭政通以功升泉州衛指揮同知

福建通志

歐磐滁州人成化中擢廣東都指揮僉事屢剿蠻寇有功以薦充廣西右參將討融縣八峯獍克之又偕按察使陶魯攻破鬱林陸川賊黃公定胡公明等進都指揮使同知府江永安諸獍亂磐自象州修仁直搗陸峒所向摧破遷廣西副總兵毀思恩土官岑濬所築石城濬來拒擊敗之進都督僉事鎮湖廣磐爲

將廉能得士久鎮南邦蠻人畏服明史本傳

康友惠字濟民全椒人正德中為郟城尉勦賊劉六等攻城守將孫達遜惠激厲義勇選士伏城外劫之斬獲數十策賊必復來乃增城浚河為堅守計賊果大至礮擊之一發斃其渠名白者賊大駭以火車攻城惠潛燭之遂乘勝追擊賊凡七至不克乃遠遜功竟以位卑不錄卒於官百姓立祠肖像祀之全椒縣志

丁桐全椒人福建興化衛僉事晟之孫嘉靖間襲任善射習海事每駕颿自持舵截海能於檣側馳突呼嘯先後歷小埕南日浯與寨把總屢有捕誅島夷功已而以海禁太嚴中蜚語下獄諸寨水軍扼腕流涕願為桐死久之刑部郎中陸穩以卹刑至力為疏理會倭侵軼江浙給事曹禾薦桐材勇詔釋之而桐已孤憤久結出獄遂絕福建通志新增

孫克振字養翀滁州人萬厯癸卯舉人歷知東鄉湯溪二縣有
聲明季流寇犯除州克振與同鄉陳國計等協力守禦危城得
全國計亦由明經仕至平樂令

江南通志

金九陞字允納全椒人萬厯乙卯舉人崇禎中知棗陽縣流寇
躡即襄九陞練民兵儲糧以待獻賊入境潛兵擊之殺其渠泚
天一字王擢南光祿寺署正歷戶部郎中寇犯廬鳳兵部尙書
范景文委督浦口倉儲寇不敢倡累遷柳桂兵備討平猺賊馮
異諸峒聞風乞降且請入峒撫納左右勒勿行九陞毅然許之
比至婉言慰諭諸酋相率羅拜受約束而還弟九殿號盤石究
心韜略討論輿地形勢著要說山東賊起九殿條上方略兵民
戢然以子光辰累封大理寺正卿

一統志湖北廣西名宦江南舊通志

國朝晉國璧全椒人順治初以貢任袁州推官土賊起城守有功

江南
通志

周球字季珍來安人順治乙未武進士授廣州左衛守備升南
贛遊擊癸丑冬吳逆倡亂江楚震動球日訓練以備不虞甲寅
三月閩寇曾若千以萬眾截贛下河巫把什以千眾屯贛大柏
球連擊大敗之六月僞將軍賈振魯自黃竹入寇陷石城圍甯
都球進師黃坊戰自辰至申賊始散走疾馳追擊連破賊營十
二甯都圍解十二月僞總兵謝海叔圍會昌球援之抵珠蘭擒
其將林九苞乙卯降人陳昇郭應輔據龍泉叛球奉檄追剿獲
陳昇斬之又擒僞總兵凌子亮陳飛雲丙辰二月賊僞將軍韓
大任以閒諜來誘縛之以獻升贛州協鎮十月敗賊黃土標王
割耳於天一宮斬千餘級實授參將閩疆甫定僞總兵邱萬寶
等復踞龍泉球方病足毅然請行戰於五里排斬三千餘級安

插難民萬二千家丁已論功加署都督僉事三月擊賊於黃塘
駐師大烏港口絕其歸路賊奔雩都又追至姜阮口斬千三百
級戊午戰於老虎洞眾軍合擊斬六千餘級韓大任降復統師
援湖南永興告急卽往趨之斬九百餘級殲偽總兵二員明日
賊復乘象渡濠球斂兵入城以火罐驚象象返奔賊填濠死者
無算敘功加左都督鎮守山西太原旋以漢羌總兵鎮撫四川
壬戌

上念畿輔重地移鎮眞順廣大保定等處卒於官

贈太子太保

賜祭葬

江南通志
滁州志

孫可宗全椒人康熙癸酉武舉第一明年成進士授襄陽守備

從征紅苗戰比有功升陝西興安都司

全椒縣志

楊廷幹全椒人以武舉歷官狼山遊擊主倫肆竊守禦黃河獲遺醜升廣東澄海鎮副將訓士捕盜洋面肅清升福山營總兵

全椒縣志
以上舊志

和州

梁昌義之歷陽烏江人少有武幹齊曹武爲雍州以義之補防閣及武代還梁高祖爲雍州刺史義之遂畱事焉義師起版爲輔國將軍軍主每戰必捷建康平封永豐縣侯出爲盱眙太守累遷北徐州刺史鎮鍾離魏中山王元英率元道明楊大眼等眾數十萬來寇鍾離鍾離北阻淮水魏人以邵陽州西岸作浮橋跨淮通道以攻城城中兵纔三千義之隨方抗禦每彎弓所向無不應弦高祖遣曹景宗韋叡來救大破魏義之追至洛口而還以功進號軍師將軍義之性寬厚爲將能撫御得人死力

及居藩任吏民安之改封營道縣侯及卒高祖深慟惜之謚曰

烈子寶業嗣

梁書本傳

唐勒思齊歷陽人生有神力武后召見奇之授游擊將軍李白勒將軍歌云太古歷陽郡化爲洪川在江山猶鬱盤龍虎祕光

彩特生勒將軍神力百夫倍

李太白集江南通志

明華高和州人以巢湖水師來歸積功遷秦淮翼元帥與鄧愈徇廣德守將嚴兵城下高以數騎挑戰衝擊大破之遂取其城得兵萬人糧數千斛從平常州破趙普勝敗陳友諒克武昌授湖廣行省左丞進行省平章政事封廣德侯緒廣東邊海城堡高請行事竣至瓊州卒以無子納誥券墓中贈巢國公謚武莊

明史本傳

仇成含山人以功遷秦淮翼副元帥太祖攻安慶敵固守不戰

廖永忠張志雄破其水寨成以陸兵乘之遂克安慶以成爲橫
海捐揮同知守其地時左君弼據廬州羅友賢以池州叛四面
皆賊境成撫聚軍民守禦嚴密漢兵不敢東下從征鄱陽殲敵
涇江口功最洪武三年僉大都督府事鎮遼東十二年封安慶
侯二十年充征南副元帥討平容美諸峒復從大軍征雲南功
多卒贈皖國公諡莊襄子正襲

明史本傳

王銘字子敬和州人隸俞通海麾下與吳軍戰太湖矢中右臂
引佩刀出其鏃復戰龍灣之役逐北至采石銘獨衝敵陣敵兵
攢槊刺銘傷頰銘三出三入所殺無算前後數十戰功多命守
松江移太倉捕斬倭寇千餘累官至長淮衛指揮僉事移鎮溫
州上疏請繕城濬濠悉倍於舊加築外垣起海神山屬郭公山
首尾二千餘丈宏敞壯麗屹然東浙巨鎮帝甚嘉之歷右軍都

督僉事後坐藍黨死

明史本傳

楊文含山人父興戰死鄱陽文襲屢有功洪武二十八年八月以都督爲鎮南將軍討龍州土官趙宗壽宗壽伏罪來朝令移兵討奉議南丹叛蠻十一月奉議南丹悉平三十年以左都督屯田遼東古州蠻林寬叛以齊讓爲平羌將軍討之讓逗遛未進九月以文爲征虜將軍代齊讓城銅鼓衛未幾讓禽林寬械入京誅之三十二年復平其餘黨乃詔班師

明史太祖紀廣西土司傳

徐義和州人從太祖渡江每臨陣輒躍馬揮刀作虎吼衝突眾皆披靡以前後功累擢建甯右衛指揮僉事又州人胡淵沈興亦皆以材勇從太祖有功官指揮

江南通志

紀清含山人從太祖渡江以功授濟陽衛指揮後從燕起兵入

京師遷右軍都督僉事

江南通志

張亨含山人元末與從父驥率邑人保障鄉里同來歸從圍平江驤戰死閭門亨以功授虎賁衛管軍千戶從取太原征巴蜀皆有功遷興化衛親軍指揮使

和州志

徐信字彥實和州人襲父職爲建甯右衛指揮僉事永樂間以擒尤溪寇擢福建行都司指揮僉事正統十三年鄧茂七亂偪城爲營信偵其虛實分兵三路進破其營斬獲殆盡

福建通志

李溶和州人父旺爲燕山左護衛副千戶溶嗣官從燕起兵入京師累遷都指揮使封襄城伯永樂元年出鎮江西永新盜起捕誅其魁召還卒子隆字彥平嗣封雄偉有將略數從非征出奇料敵帝器之既遷都以南京根本地命隆畱守仁宗卽位命鎮山海關復守南京清慎守法尤敬禮士大夫及召還南都士民流涕送之卒子珍嗣歿於土木贈侯諡悼僖無子弟瑾嗣成

化三年四川都掌蠻叛命佩征夷將軍印充總兵官往討盡破
諸蠻寨斬首四千五百有奇分都掌地設官控制之師還進侯

累加太保卒贈芮國公諡壯武子黼嗣伯

明史本傳

童養銳舍山人隆慶間以福建泉州衛指揮使任中路南日寨
把總初養銳與父乾震捕斬福清倭有軍中二童倭賊且空之
諺及是以擊沈海賊功令其子與藩升襲都指揮同知

福建通志新

呼良朋和州人世襲鎮東衛千戶戚繼光奇之令督僉事築鎮

東城至今賴之後徙廣西大帥佩征蠻將軍印

福建通志

張嶺字九仞舍山人以薦授錦衣衛把總生擒賊首帖天飛擢

禁衛守備崇禎八年流賊至和嶺設守禦邑人賴之

和州志

國朝張翰字萬屏舍山人由贛州城守千總援甯都石城皆有功

遷守備攝福建福清營遊擊康熙十九年從征臺灣大破逆賊
林升等進廈門取金門掃平逆穴特授左都督補廣東右翼鎮
遊擊遷永固城副將

江南通志
以上舊志

廣德州

吳朱治字君理丹陽故鄣人初爲縣吏後察孝廉州辟從事隨
孫堅征伐中平五年拜司馬從討長沙零桂三郡賊周朝蘇馬
等有功堅表治行都尉從破董卓於陽人入洛陽表行督軍校
尉特將步騎東助徐州牧陶謙討黃巾會堅卒治翼策就袁術
知術德政不立乃勸策還平江東太傅馬日磾在壽春以治爲
吳郡都尉治到吳吳郡太守許貢拒之於由拳治大破之貢走
治遂入郡領太守事策卒治與張昭等共立權權表治爲九真
太守行扶義將軍後封毗陵侯以年老思戀鄉土自表屯故鄣

諸父老故人莫不詣門治皆引進與其飲宴鄉黨以爲榮三國本傳

按續漢書郡國志中平年分故鄆縣南置吉安而無廣德縣是故鄆卽廣德也胡三省通鑑注亦云今廣德軍是故鄆縣之地朱治於中平五年前已隨孫堅征伐則是時并未有吉安入之廣德可以無疑但吳志附朱然朱績於治後然本施氏治姊之子志旣未明言爲何地人故闕之以示慎

明孫昇字伯高建平人永樂甲申進士除臨清令發廩賑饑以最擢山東道御史值蒲臺縣妖婦唐賽兒作亂青州衛指揮高鳳不能制攻莒州圍安邱昇統張楹馬撫王眞等敗賊於諸城山東悉平擢遼府長史調知建昌府三年致仕歸南畿志

蔡汝蘭字子芳廣德人胡宗憲視師海上聘掌書記授都閫以

征倭功歷南贛參將宋大斌者州人隸汝蘭麾下以功官遊擊

征倭復朝鮮皆有功進遼東參將未之官卒

廣德州志

國朝章良臣字鼎賢廣德人康熙初應募入閩爲武弁金某子遂

冒其姓從平耿逆及澎湖臺灣諸寇叙功加等授左都督引疾

歸里軍民立石頌之

廣德州志

李國盛字公宇建平人康熙十四年從征福建爲把總調衢州

千總明年又調金華破賊馬公輔由江山進仙霞嶺連克三關

進師延平次小門山枕楓嶺大破賊焚其寨十八年攻漳州守

鳳山十九年攻獅子山觀音山等處連破十九寨克海澄取厦

門授都司敘功加等授左都督以疾致仕子庭芝世襲拖沙喇

哈番官至青州營守備乾隆二年薨

恩世襲雲騎尉

廣德州志
以上舊志

六安州

漢英布六安人年少時客相之當刑而王及坐法鯨布欣然笑以諭輸驪山亡之江中爲盜項梁定會稽布以兵屬西擊景駒秦嘉等布常冠軍及籍殺宋義使布先涉河擊秦數有利入關封九江王都六田榮叛楚項籍徵兵九江布稱疾不往漢敗楚彭城布又稱疾不佐楚項籍怨之數誚讓布布愈恐漢乃使隨何說布布遂歸漢以兵會垓下亡楚剖符爲淮南王都六漢旣殺韓信彭越布與二人同功一體發兵反漢擊之布走長沙哀王使人誘布師古曰惠帝二年哀王同始立此是芮之子成王耳至番陽殺之漢書本傳明朱亮祖六安人仕元爲義兵元帥太祖克甯國禽之旣而叛去據宣城常遇春與之戰受傷而還諸將莫敢前太祖親往督戰縛以見謂之曰爾將何如對曰生則盡力死則死耳壯而釋

之以功授樞密院判破李伯昇攻陳友定功多遷浙江行省參政帥師討方國瑛降之洪武元年副廖永忠取廣東悉定其地進平廣西班師三年封永嘉侯四年伐蜀徇下未附州縣十二年出鎮廣東亮祖不學多不法明年召還與其子暹同鞭死御製壙誌仍以侯禮葬

明史本傳

葉旺六安人與合肥馬雲同隸長鎗軍謝再興爲千戶再興叛二人自拔歸以功並授指揮僉事洪武四年偕雲鎮遼東元太尉納哈出以兵至見備禦嚴不敢攻由蓋州城南十里沿柞河道引歸旺先以兵扼柞河綠河壘冰爲牆沃以水凝沍如城旁設阱奔伏兵以俟寇至伏起納哈出倉皇趨連雲島遇冰城旁走悉陷於奔遂大潰僅以身免第功旺與雲俱進都督僉事十二年命雲征大甯旺留鎮十九年召旺爲後軍都督府僉事居

三月遼東有警復命還鎮二十一年卒旺鎮遼凡十七年與雲

同功而旺尤久遼人德之嘉靖初命遼同立祠以祀

明史本傳

聶英六安人父輝元末元帥屯州西軒皇嶺保障鄉里來歸除

六安千戶所百戶輝卒英襲從藍玉征雲南克普定盤江所向

有功改六安衛左所

六安州志

張義六安人父賢明初以苗軍千戶歸附累升福建指揮僉事

陣亡義洪武二十五年繇觀海衛調福甯衛五傳至壁嘉靖三

十三年任烽火寨把總倭犯大金等處俘馘有功三十八年倭

數萬寇巖前眾欲昇之避壁曰吾世受國恩有死爾遂戰死事

聞孫邦奇襲部錄壁功升指揮使邦奇子萬紀萬厯開任銅山

把總溫州守備惠潮參將廣西總兵爲人洞精簡易食糲衣麤

結束如士卒寇盜至驚舉颺發時時與士卒雜戰得海上盜收

用之因以攻他盜其把總銅山時年二十餘爾又初釋諸生業而驍健聞海上有盜魁大言曰吾白頭天吳之宮甯復有張孺子者乘巨艘詐爲大帥徑入其界地萬紀從數人擊舟往逐之舟漸近鼓聲旗色不相應萬紀跳盜艘手殺其三人盜魁出反跳萬紀舟萬紀從人與格鬪立擒之萬紀每陰雨度賊且出輒駕小艇如漁父腰弓劍隨驍勇數輩遇賊至輒登舟擊殺之雖竇神意彌王所居海上盜悉遠徙估客商舶如行內港在惠潮時尤著四十一年有征黎之役萬紀以總兵先登深入兵無後繼發憤自焚死了弱家貧老母尙在事聞賜襲

福建通志
新增

張文六安人初依戴雲從其姓名文政雲爲元安豐路樞密院同知守禦六安固鎮率所部來歸授雲官後爲江西省理問選文政充舍人從征浙西中原並有功洪武三年復姓單名文除

濟南管軍百戶嗣後無役不從並著勞績升浙江都指揮僉事

子豫亦以功官陝西行都司都指揮僉事

六安州志

張澡字子新六安人參政諧之子也澡少襲祖爵爲六安衛指揮使隆慶四年駐福山防倭有功歷至參將前後任浙江十年大小數十戰皆捷萬曆九年爲吳淞總兵上水操陸操沿海諸圖常勅稱善移鎮雲南築三大營一曰威遠二曰壩革三曰九江並築子城相應援苗無敢犯朝廷嘉其功移鎮廣西以南京都督僉事致仕著有正續白將傳節評孫子繹語左氏附餘等

書行世

江南通志六安州志

國朝黃鼎字玉耳六安諸生崇禎閒流寇猖獗巡鹽張倫序薦鼎異才令往光固糾合義勇爲進取計闖賊據南陽鼎擒殺其所委署州縣授黃州通判歷至總兵督理剿寇事宜駐光固

大兵南下鼎歸誠以總兵駐防皖江賊李時嘉焚掠太湖鼎討平之又平定池陽水賊歸還流散難民婦女數千人爲同列所忌罷歸總督馬國柱題留軍前參決機務剿定麻埠賊張福寔鼎功居多

江南通志

黃九疇字倫敘總兵鼎之姪也鼎軍務悉屬之爲總督馬國柱所知江西亂授南康營參將進剿所至款伏江西巡撫蔡士英尤重之題留韓下尋改廣西柳州營三藩煽亂九疇自拔先還大將軍圖海稱其才奏改文職授僉事道隨征雲南滇平應就職慨然曰屢經多難得守邱隴足矣引疾歸

六安州志

羅一楨字貞甫霍山貢生順治初山賊侯應龍張福寔盤踞麻埠屢犯霍城一楨偕知縣團練鄉勇分列八營城西尤當賊衝一楨身自堵禦相機戰守頻挫賊鋒城得不陷

霍山縣志

黃九錫字公位六安人順治乙未武進士性至孝父鏐明末守
備昌平歿於王事九錫閒關數千里冒刃入賊營負其骸歸季
父鼎進剿山賊用爲參謀平定鷹巢蓮花等寨而不居其功居
家惟讀書教子力行善事嘗獨力建尊經閣疾革遺命諸子成
之

六安
州志

史世科字祥宇原籍遼東明季徙六順治中歷官蘇松鎮標守
備駐防崇明屢卻海寇又從提督梁化鳳立功升都司世襲拉
沙喇哈番子斌字兩勳以蔭守禦廣東新會遷衢州守備龍門
都司

六安
州志

江總字奕鴻六安人康熙戊辰武進士爲鎮江守備改河南適
汝州民變大帥令率百騎往傳諭解散宜陽變又令往時太守
某在城眾欲得而甘心總爲設方略堅守四十日眾始解去兵

部侍郎張廷樞往按悉其事深器重之擢天津都司告歸著有武經備旨讀史百詠諸書

六安州志

鮑友仁字輔純六安人以武舉官江西廣信營守備勤於訓練升武甯都司適楚省教匪滋事籌解火藥記功進汀州遊擊嘗三鼓追捕巨盜至數十里及之發二矢殺二人生擒數十人以歸汀州自此無盜升參將查理洋匪朱渥等投誠事宜奉

旨加一級升督標副將以足疾歸

六安州志以上舊志

鮑友智字臨川六安人一甲二名武進士嘉慶二十年官江甯城守協副將擒教匪方榮升等加總兵銜擢湖南永州總兵前後十八年三署提督馭將士簡軍實號令嚴明賞罰必信道光十年剿辦搖匪輕進鑄級事平復原官嘗與羅思舉論兵謂宜將識兵心兵知將意子翰雄由武舉官廣西守備從友智辦搖

有功卒於軍

六安州志
以下新修

鮑起豹字愛山六安人父友信官昭通守備征苗死事起豹襲世職道光中歷瓊州鎮總兵剿撫生黎擒斬海盜九龍發石土六等百七十餘人又獲文昌縣聚眾匪首焚其名冊咸豐初累擢湖南提督剿粵逆於永州破斃僞王蕭朝貴馳援武昌省城堅守八十餘日出奇兵擊賊圍乃解四年賊犯岳州湘潭奉

命駐長沙調兵分援俄解職卒

六安州志

戴春林六安人咸豐間辦團立功同治初從潘鼎新攻江浙歸逆累保

記名提督復在河南山東直隸等省統帶馬步協剿捻逆疊受重傷調赴李鴻章西征行營同治九年傷發在營病故奏請從優

予卹祀本省昭忠祠又都司王福奎沈勇權俱六安人立功病故一併

議卹奏案 咨文

泗州

漢陳嬰故東陽令史居縣中素信謹稱為長者東陽少年殺其令相聚數千人欲置長無適用乃請陳嬰為長縣中從者二萬人欲立嬰為王異軍蒼頭特起陳嬰母謂嬰曰自我為汝家婦未嘗聞汝先古之有貴者今暴得大名不祥不如有所屬事成猶得封侯事敗易以亡非世所指名也嬰乃以兵屬項梁為楚柱國項羽死屬漢高祖六年封堂邑侯史記 功臣表

唐劉行舉盱眙人武后時徐敬業起兵揚州行舉與楚州刺史李從福連和嬰城不從敬業平拜遊擊將軍萬姓統譜 江南通志

按唐書李勣傳敬業起兵楚州司馬李崇福率所部三縣應之今統譜通志所載全與史異第刺史司馬官既不同崇福

從福名亦小異姑仍舊志錄之

宋劉綱招信縣人父位死王事綱襲其職仍保聚橫山今山上
有墩人呼摩旗墩相傳爲綱建旗之處移鎮淮揚遷洪州總管

江南
通志

明李文忠字思本盱眙人太祖姊子也年十二而母死踰二年
父貞攜之謁太祖於滁陽太祖喜甚撫以爲子使從己姓年十
九以舍人將親軍所向有功授帳前左副都指揮使守嚴州連
破苗帥楊完者完者死降其眾張士誠來寇復連破之進同僉
行樞密院事拜浙東行省左丞總制嚴衢信處諸全軍事士誠
屢寇諸全並擊卻之別築一城以相犄角士誠復以二十萬眾
來攻新城文忠馳救之眾告賊勢盛宜少駐文忠仰天誓曰國
家之事在此一舉乃分軍爲左右而自當敵衝會處州援軍亦

至文忠引鐵騎數十乘高馳下賊圍之數重文忠縱騎馳突賊皆披靡大軍乘之城中亦鼓譟出敵遂大潰吳平加浙江行省平章事復姓李氏洪武二年從常遇春出塞薄上都走元帝遇春卒代將其軍明年與大將軍分道北征時元帝已崩太子愛猷識里達臘新立文忠謀知之兼程趨應昌元嗣君北走獲其敵子買的立八刺暨后妃諸王將相數百人及宋元玉璽玉冊等降其眾數萬獻捷京師帝御奉天門受朝賀大封功臣文忠功最授右柱國大都督府左都督封曹國公家故多客嘗以客言勸帝少誅戮又諫征日本及言宦者過盛非不近刑人之義以是忤旨十六年遂得疾明年卒追封岐陽王諡武靖配享太廟肖像功臣廟位皆第三父貞前卒贈隴西王諡恭獻三子景隆增枝芳英皆帝賜名景隆小字九江以大將軍伐燕喪師百

萬召還及燕師至開金川門出降墮其家聲

明史本傳

鄧愈虹縣人初名友德太祖賜名愈父順興據臨濠與元戰死兄友隆復死眾推愈領軍事年十六每戰先登眾服其勇自盱眙來歸授管軍總管從渡江有功守廣德州破長鎗帥謝國璽於城下克徽州守之敗楊完者破余子貞說降饒守於光遂移守饒饒濱彭蠡與友諒接境數擊卻其寇兵進江南行省參軍友諒丞相胡廷瑞獻龍興路改洪都府以愈爲江西行省參政守之爲賊所破旣而復得仍命守之友諒眾六十萬人來寇樓船高與城等城壞三十餘丈愈且築且戰不解甲者三月太祖自將來援圍始解論功與克敵等武昌平領兵徇未附州縣進江西行省右丞吳元年建御史臺召爲右御史大夫領臺事洪武元年經略中原率襄漢兵取南陽以北未附州縣賊元兵於

瓦店遂克南陽禽史國公等二十六人均房金商悉定三年從
大將軍出定西敗擴廓進克河州出甘肅西北數千里而還授
右柱國封衛國公同參軍國事五年以征南將軍討辰豐諸蠻
克四十八洞十年以征西將軍偕沐英討吐番川藏窮追至崑
崙山俘斬萬計畱兵戍諸要乃還至壽春病卒追封甯河王諡
武順子鎮嗣改封申國公以征南副將軍平永新龍泉山寇其
妻李善長女也坐黨死

明史本傳

費聚字子英五河人太祖遇之於濠偉其貌深相結定遠張家
保有民兵郭子興欲招之太祖與聚偕往既定復叛又與聚計
取之降其眾又招降谿鼻山秦把頭等從取靈璧克泗滁和州
授承信校尉既定江東克長興以聚副耿炳文守之屢擊敗張
士誠寇兵士誠喪氣吳平進指揮使從湯和討方國珍降之復

由海道取福州剿海寇葉陳二姓於蘭秀山洪武二年大軍取西涼以聚鎮平涼三年封平涼侯明年從傅友德征雲南雲南平進取大理蠻地悉平置貴州都指揮司以聚署司事十八年以總兵官征廣南禽火立達還鎮雲南召還坐李善長黨死子超征方國珍時戰死璫官江西參政孫宏征雲南有功爲右衛指揮使後以罪戍金齒

明史本傳

趙彝虹縣人爲燕山右衛百戶從北征擢永平衛指揮僉事降

燕歷戰皆有功成祖稱帝封忻城伯宣德初卒子榮嗣

明史鄭亮傳

周長天長人爲燕山中護衛燕兵起有功永樂九年與尙書宋

禮侍郎金純治漕渠修復會通河置十五閘濬黃河故道以殺

水勢十五年卒追封萊陽伯諡忠毅

明史功臣表

侯端盱眙人永樂中授金山衛指揮同知十六年倭寇入犯端

巷戰被重傷復招散卒進戰焚賊船十餘艘賊不得歸遂盡殲

之一統志江蘇名宦

韓觀字彥賓虹縣人高陽忠壯侯成子也以舍人宿衛忠謹爲

太祖所知授桂林右衛指揮洪武十九年討平柳州融縣諸蠻

遷廣西都指揮使嗣是屢平諸蠻前後斬獲萬餘級性鷙悍誅

罰無所假成祖卽位委任如初命佩征南將軍印鎮廣西知其

嗜殺璽書戒之九年移鎮交趾十二年卒明史本傳

楊盛虹縣人成化閒任福建北路烽火寨把總部伍整肅士卒

用命累擒劇賊有功福建通志新増

張廉天長人從燕起兵有功又隨北征累官都督僉事宜德七

年卒追封榆次伯諡忠敏明史功臣表

秦經國五河人嘉靖中世襲鎮東衛指揮同知倭薄城下一再

殲之擢守備進參戎破張連擒林鳳剿曾一本滅劉貴大著戰
功經國諳海道自浙至粵無不知其曲折臥聽水聲能辨其地
嘗言岳武穆武臣不惜死五字勝孫武十三篇也論者謂東南
水戰無踰經國云

福建通志

國朝孫文標字俊侯盱眙人從兄毓秀明末爲九江總兵南都覆
毓秀死焉康熙十三年耿逆叛文標投筆從戎隸參將蔣茂勛
下僞總兵馬九玉越仙霞嶺犯浙文標一戰敗之進攻九龍山
賊踞山依險建策從硯山上襲其背破之賊平復從茂勛定八
閩克臺灣皆有功授陝西固原遊擊遷山西平魯參將晉廣東
三江口副將卒於官

泗州志
以上舊志